



(IT-08-91)

STANIŠIĆ i ŽUPLJANIN



MIĆO STANIŠIĆ

Optužen za progone na političkoj, rasnoj i vjerskoj osnovi, istrebljenje, ubistvo, mučenje, nehumana djela (uključujući prisilno premještanje), deportaciju i okrutno postupanje



Od 1. aprila 1992., ministar novoosnovanog srpskog ministarstva unutrašnjih poslova u Bosni i Hercegovini (MUP RS)

STOJAN ŽUPLJANIN

Optužen za progone na političkoj, rasnoj i vjerskoj osnovi, istrebljenje, ubistvo, mučenje, nehumana djela (uključujući prisilno premještanje), deportaciju i okrutno postupanje



Načelnik regionalnog Centra službi bezbjednosti (u daljem tekstu: CSB) u Banjaluci, gradu u sjeverozapadnoj Bosni i Hercegovini; član Kriznog štaba Autonomne regije Krajina (ARK), i savjetnik predsjednika Republike Srpske (RS) za unutrašnje poslove

Krivična djela za koja su optuženi (primjeri):

Progoni na političkoj, rasnoj i vjerskoj osnovi, istrebljenje, ubistvo, mučenje, nehumana djela (uključujući prisilno premještanje) i deportacija (zločini protiv čovječnosti)

Ubistvo, mučenje i okrutno postupanje (kršenja zakona i običaja ratovanja)

- Od 1. aprila do 31. decembra 1992., Mićo Stanišić, u dogovoru s drugim učesnicima udruženog zločinačkog poduhvata (UZP), izvršio je, ili je lično podsticao ili na druge načine podržavao i pomogao planiranje, pripremanje ili izvršenje progona bosanskih Muslimana i bosanskih Hrvata na političkoj, rasnoj i vjerskoj osnovi; istrebljenje, ubistva, mučenje, okrutno postupanje, nehumana djela, deportaciju i prisilno premještanje stanovništva bosanskih Muslimana i bosanskih Hrvata u opštinama Banja Luka, Bileća, Bosanski Šamac, Brčko, Doboј, Donji Vakuf, Gacko, Ilijaš, Ključ, Kotor Varoš, Pale, Prijedor, Skender Vakuf, Sanski Most, Teslić, Vlasenica, Višegrad, Vogošća i Zvornik.

- Tokom istog perioda, Stojan Župljanin, u dogovoru s drugim učesnicima UZP-a izvršio je, ili je lično planirao, podsticao, naredio ili na druge načine podržavao i pomagao planiranje, pripremanje ili izvršenje progona bosanskih Muslimana i bosanskih Hrvata na političkoj, rasnoj ili vjerskoj osnovi, istrebljenje, ubistva, mučenje, okrutno postupanje, nehumana djela, deportaciju i prisilno premještanje stanovništva bosanskih Muslimana i bosanskih Hrvata u opštinama ARK Banja Luka, Donji Vakuf, Ključ, Kotor Varoš, Prijedor, Sanski Most, Skender Vakuf i Teslić.

MIĆO STANIŠIĆ	
Datum rođenja	30. jun 1954., u selu Ponor, opština Pale, Bosna i Hercegovina
Optužnica	Prvobitna optužnica: 25. februar 2005., objelodanjena 10. marta 2005.; izmijenjena optužnica: 22. august 2005.; redigovana izmijenjena optužnica: 11. oktobar 2005.; objedinjena (spojena) optužnica: 29. septembar 2008., izmijenjena objedinjena optužnica: 1. maj 2009.; druga izmijenjena objedinjena optužnica: 10. septembra 2009.
Datum predaje	11. mart 2005
Prebačen na MKSJ	11. mart 2005.
Prvo i daljnja stupanja pred Sud	17. mart 2005., izjasnio se po svim tačkama optužnice da nije kriv; 20. novembra 2008., izjasnio se da nije kriv po novim optužbama iz spojene optužnice

STOJAN ŽUPLJANIN	
Datum rođenja	22. septembar 1951., u mjestu Maslovare, Kotor Varoš, Bosna i Hercegovina
Optužnica	Prvobitna optužnica: 14. mart 1999.; izmijenjena optužnica: 20. decembar 1999.; druga izmijenjena optužnica: 5. oktobar 2004.; objedinjena (spojena) optužnica: 29. septembar 2008., izmijenjena objedinjena optužnica: 1. maj 2009.; druga izmijenjena objedinjena optužnica: 10. septembra 2009.
Datum hapšenja	11. jun 2008. u Srbiji
Prebačen na MKSJ	21. jun 2008.
Prvo i daljnja stupanja pred Sud	23. jun 2008., odgodio izjašnjavanje o krivici za 30 dana; 21. jula 2008. izjasnio se da nije kriv ni po jednoj tački optužnice; 20. novembra 2008., izjasnio se da nije kriv po novim optužbama iz spojene optužnice

STATISTIČKI PODACI

SUĐENJE	
Početak suđenja	14. septembar 2009.
Završne riječi	Zakazane za period od 29. maja do 1. juna 2012.
Pretnosno vijeće II	sudija Burton Hall (predsjedavajući), sudija Guy Delvoie, sudija Frederik Harhoff
Tužilaštvo	Thomas Hannis, Joanna Korner
Advokat odbrane	Za Miću Stanišića: Slobodan Zečević, Slobodan Cvijetić Za Stojana Župljanina: Dragan Krgović, Aleksandar Aleksić

POVEZANI PREDMETI <i>po geografskom području</i>	
KARADŽIĆ (IT-95-5/18) "BOSNA I HERCEGOVINA" & "SREBRENICA"	
KRAJIŠNIK (IT-00-39 & 40) "BOSNA I HERCEGOVINA"	
MLADIĆ (IT-09-92) "BOSNA I HERCEGOVINA" I "SREBRENICA"	
PLAVŠIĆ (IT-00-39 & 40/1) "BOSNA I HERCEGOVINA"	
ŠEŠELJ (IT-03-67)	
STANIŠIĆ & SIMATOVIĆ (IT-03-69)	
BRĐANIN (IT-99-36-T) "KRAJINA"	
TALIĆ (IT-99-36/1) "KRAJINA"	

OPTUŽNICA I OPTUŽBE

Prvobitna optužnica protiv Miće Stanišića je potvrđena 25. februara 2005., a objelodanjena 10. marta 2005. U skladu s odlukama Pretresnog vijeća od 19. jula 2005. i 22. augusta 2005., Tužilaštvo je 22. augusta 2005. podnijelo izmijenjenu optužnicu. Nakon što je Pretresno vijeće zatražilo pojašnjenje, 22. septembra 2005. tužilac je podnio redigovanu izmijenjenu optužnicu. Dana 11. oktobra 2005., Vijeće je prihvatilo izmjene i potvrdilo optužnicu kao važeću. (Broj predmeta Miće Stanišića bio je IT-04-79).

Prvobitna optužnica protiv Stojana Župljanina, koja je kao saoptužene uključivala i Radoslava Brđanina i Momira Talića potvrđena je 14. marta 1999. Nakon hapšenja Brđanina i Talića, 20. decembra 1999., potvrđene su izmijenjena optužnica protiv njih dvojice i odvojena izmijenjena optužnica protiv Župljanina. Dana 6. oktobra 2004. s dopuštanjem Pretresnog vijeća, Tužilaštvo je podnijelo izmijenjenu optužnicu protiv Stojana Župljanina. To je bila posljednja važeća optužnica protiv Stojana Župljanina (broj predmeta IT-99-36/2), koji je uhapšen 11. juna 2008., a 21. juna 2008. prebačen na MKSJ.

Dana 16. jula 2008., Tužilaštvo je podnijelo zahtjev za spajanje predmeta protiv Miće Stanišića i Stojana Župljanina. Dana 23. septembra 2008. Pretresno vijeće je odobrilo zahtjev i naložilo Tužilaštvo da podnese izmijenjenu objedinjenu optužnicu. Spojena optužnica (nazvana "objedinjena") je podnijeta 29. septembra 2008.

Dana 1. decembra 2008., Tužilaštvo je podnijelo zahtjev za dopuštenje da izmijeni objedinjenu optužnicu kako bi dodatno izmijenilo navode protiv optuženih i ispravilo više tipografskih grešaka. Zahtjev je odobren 28. aprila 2009., a Tužilaštvo je podnijelo izmijenjenu objedinjenu optužnicu 1. maja 2009.

Dana 9. juna 2009., Vijeće je pozvalo Tužilaštvo da ukloni više događaja navedenih u optužnici. Nakon toga, 20. jula 2009., Tužilaštvo je podnijelo zahtjev kojim se traži uklanjanje pet incidenata. Zahtjev je odobren 4. septembra 2009. i Tužilaštvo je 10. septembra 2009. podnijelo novu, drugu izmijenjenu objedinjenu optužnicu.

U optužnici se navodi da je od 1. aprila 1992. Stanišić bio ministar novoosnovanog srpskog Ministarstva unutrašnjih poslova u Bosni i Hercegovini (MUP RS), Kao ministar MUP-a RS, Stanišić je bio na najvišem položaju u Ministarstvu, i bio je član Vlade Republike Srpske - republike bosanskih Srba . Što se tiče Župljanina, u optužnici se navodi da je od 1991. bio načelnik regionalnog Centra službi bezbjednosti (CSB) u Banjaluci. Najkasnije od 5. maja 1992. do jula 1992. bio je član Kriznog štaba Autonomne Regije Krajina (ARK), a 1992. godine je postao savjetnik predsjednika Republike Srpske za unutrašnje poslove.

Prema optužnici, Stanišić i Župljanin učestvovali su u udruženom zločinačkom poduhvatu (UZP) kao saizvršitelji. UZP je nastao najkasnije 24. oktobra 1991., kada je osnovana Skupština srpskog naroda u BiH, i postojao je tokom cijelog perioda sukoba u BiH do potpisivanja Daytonskih sporazuma 1995. godine. Cilj UZP-a bio je trajno uklanjanje bosanskih Muslimana, bosanskih Hrvata i drugog nesrpskog stanovništva sa teritorije planirane srpske države, počinjenjem, između ostalog, navedenih zločina. U tom UZP-u učestvovali su brojni pojedinci: Stanišić i Župljanin su obojica djelovali u dogovoru s drugim učesnicima UZP-a uključujući, između ostalih, Momčila Krajišnika, Radovana Karadžića, Biljanu Plavšić, Nikolu Koljevića (preminuo), Momčila Mandića, Velibora Ostojića, general Ratka Mladića, i druge članove rukovodstva bosanskih Srba i vodeće članove Srpske demokratske stranke (SDS) na republičkom, regionalnom i opštinskom nivou; vodeće pripadnike Jugoslovenske narodne armije (JNA), Vojske Republike Srpske (VRS) u regiji uključujući general Momira Talića (preminuo), vodeće članove CSB-a, vodeće članove Službi javne bezbjednosti ("SJB") uključujući Simu Drljaču (preminuo), vodeće članove regionalnih i opštinskih kriznih štabova uključujući Radoslava Brđanina, i vodeće članove drugih civilnih tijela u BiH.

Mićo Stanišić i Stojan Župljanin su optuženi na osnovu individualne krivične odgovornosti (član 7(1) Statuta Međunarodnog suda) i na osnovu krivične odgovornosti nadređenog (član 7(3)) za:

- **Progone, istrebljenje, ubistvo, mučenje, nehumana djela (uključujući prisilno premještanje) i deportaciju (zločini protiv čovječnosti, član 5),**
- **Ubistvo, mučenje i okrutno postupanje (kršenja zakona i običaja ratovanja, član 3).**

SUĐENJE

Optužba je počela s izvođenjem svojih dokaza 14. septembra 2009., završila 1. februara 2011. Izvođenje dokaza odbrane počelo je 11. aprila 2011., a završilo 8. decembra 2011. Tužilaštvo je predočilo svoje dokaze u postupku pobijanja od 10. do 12. januara 2012. Sudsko vijeće je pozvalo tri svjedoka. Posljednji od njih završio je sa svojim svjedočenjem 9. marta 2012.

Održavanje završnih riječi zakazano je za period od 29. maja do 1. juna 2012.